

赤水玄珠第二十八卷痘疹心印

新安生生子孫 一全著輯

異痘須知

夫痘有似凶而吉有似吉而凶者不可不知

天根痘

諸痘不起壯而天庭或曉星起灌者乃精氣外生故曰天根十有九生

天空痘

諸痘壯氣而天庭或曉星不壯者乃血不灌頂也故曰天空十無一生

明朗痘

諸痘不起而太陽太陰獨起者吉日月為明太陰太陽之謂也

明蝕痘

諸痘起壯而太陽太陰不起者凶

海溢痘

諸痘不起而耳後方員一寸獨起者名曰宿海溢是腎經旺也可治

海枯痘

諸痘盡起而耳後方員一寸獨不起泛者腎敗也名曰星宿海枯不治

又云

頭面遍身四肢耳上俱已起泛灌膿惟左耳下外有二三粒不起灌日後唇裂齒乾如不急救

必然內攻而死

有根痘

凡痘出頭面多四肢密者十分危險若地角方員畧有數粒圓如珠者十有十生蓋腎為根本

此痘腎旺故曰有根

無根痘

諸痘俱好而地角方員陷伏乾枯或灰白不起者腎水絕也不治

抱鼻痘

面部俱稀而鼻梁左右密如蚕種者此毒聚於脾胃也名曰抱鼻痘其危矣

單瑣口

面部俱稀而口角有一粒黑痘較諸痘獨大者名曰單瑣口

雙瑣口

若口角兩邊各有一粒者名曰雙瑣口皆惡候也

瑣項托頤

痘出遍身稀疎惟項下腿密一片以至於頤名瑣項托頤亦為不治之症

豬頭痘

出而頭頸窩太多者急用山豆根玄參桔梗甘草生地芎歸山查木通荆芥牛子水煎遲則毒

結于喉而死

逆痘

上少下多者名曰逆痘此無大害

兩頭痘

初標時看自胃而上自臍而下俱有而中間一截全無者是也七日内急用人參歸芪湯去枳

加蘓葉桔梗山查白芷厚朴紫草防風木通再加黃荳三十粒水煎救之出七日則難救矣

鬼捏痘

痘出遍身全無點粒其斑成片恰如打傷痕一般故名鬼捏不治

鬼痘

痘標既定手足胷背俱多而頭面全無者名曰鬼痘又日無頭痘五日之内可救五日之外難

救蓋氣血下行不能上升急用升麻川芎白芷蘇葉前胡甘草桔梗防風當歸笋尖姜水煎服如不

治曲池生毒一月見骨而死若身上四肢稀少者不可遂作鬼痘看

賊痘

痘初出便如綠荳過一日便如黃荳大再一日又如員眼大名曰賊痘其痘根窠與頂全無血

色形雖起脹按至虛軟至四五日上下出血而死但比諸痘獨大其大甚速者就是不必大

如員眼也

蛇皮痘

頭面遍身再無空地平塌而色白者係名蛇皮此必乾枯不能作漿至十一二日必死

藥患痘

初標紅潤至四五日忽變陷伏不起將至裏虛此名為藥患急用扶表裏為上

九焦痘

當額地閣顴骨胷背耳後手足皆有
一二箇黑陷者名曰九焦痘不治

伏陰痘

痘不貫膿而瀉膿血
故名伏陰急宜溫裏

空倉痘

痘雖肥滿而內實乾枯全無血水
乃空倉也決死之症

石白痘

痘中有凹而四弦特起明亮好看內實漿板不
化以手摸之其硬如石因形猶石白故名之此

症斷不可治

茱萸痘

痘不甚起而中亦有凹四弦皆有綳紋以其形
似茱萸故名之也若得根窠紅活者服內托散

去防風白芷頂中發黑點者保元
湯加芎桂身壯熱者入酒炒黃芩

虫痘

痘瘡痒甚者不必夏月中蠅生蛆雖寒月亦有
用簪挑去而愈或謂用柳條鋪下合兒卧於上

則蛆自出此蓋毒留於皮膚延綿日久臍膚熱
腐故耳磨之腐草為螢朽木生蠹其理一也

血疱痘

血疱痘者血協熱毒而自漿也刺疱血猶紅者
尚可治急與犀角地黃湯加白芍以制血解毒

血黑者不治身熱者小柴胡湯加生地血
漿不能收醫者紫草煎湯調下龍腦膏

血醫痘

痘出稀少四五日胖如碗豆六七日血醫痲乾亦似丹砂九日而痲落此氣血充足毒少故隨出隨痲不及釀膿也此痘極佳百無一二

白漿痘

痘初起發瘡頭便帶白漿者此疫癘痘也但有此便不可治主七日死

四圍痘

若瘡起發根窠四畔又旋出小痘攢簇本瘡或發似粟米不待養漿即加搔痒而死

漏瘡痘

瘡出頭有孔膿水漏出堆聚乾結其色如天疱瘡及癩頭之形者或清水非膿無事自破水去而乾黑者此皆屬氣所為傳染相似俗名漏瘡未有能治者矣

蛀痘

起腫時痘上有小孔不黑不白名曰蛀痘皆腠理不密而有是痘大泄元氣急用保元湯加丁香肉桂其孔一密而痘自起也

隱血斑

其形如豆壳灰白全無血色擦破而後血出亦無膿血故曰隱血斑也不治

赤萍瘡

瘡已出齊或未齊如赤浮萍微微高起若爬出有血急以解毒升發藥救之如成爛痘則無妨矣

紫萍瘡

瘡已出齊紫色不起不灌漿如浮萍貼在肉上者不治

白萍瘡

同上

草尾珠

其痘遍身俱陷惟骹骨一團飽滿如珠此症可治補托灌膿即痊矣

黑痘

盧廉夫曰黑痘多屬血熱黑痘本為惡証世醫恆棄而不治然形狀多端猶可解救須當辨而治之但血不活者則難救矣

一痘紫黑或黑點子隱在皮膚之間者無比散或人

牙散用猪尾血三五滴酒調下

小兒三分
大人五分

一初出便是黑點急用紫草茸二三錢醇酒半盞煎

至三分瀘查與服為妙

一其形如痣皮膚發青紫紋者服透肌散或如防風

荆芥

一形如牽牛而色瘀敗又黑痕併黑靨者並用蟬退
二十五箇紫草茸一錢水煎服

一痘黑如煤炭血不紅活者用活血散一錢酒煎紫
草湯下

一痘黑而皮膚皆黑成片者化毒湯加蟬退地骨皮
酒炒黃芩

一痘黑大而軟者氣弱而熱毒盛也用保元加紫草
一痘焦黑潮熱煩躁者小無比散井水磨犀角調下

一錢

氣血兩敗痘

近看猶如水蓼花
遠望胭脂紫可誇
臨漿清水不成膿
古聖神農無治法

復出痘

先見標一二點于面部或口唇上下如常起脹貫漿收靨不知者以為痘本稀少故也然以火照之紅點隱然藏于皮膚之內急用內托解散則痘復出不然願下決發一毒不急散其毒而發其痘即死

雲翼子二十八般異痘姑錄于后以備參看

一形雲繞頂

遍身痘好但頭頂一片紅赤者乃熱毒感于膀胱也須濟利之

一紫雲灌頂

遍身痘好但頭頂紫乾陷伏不起者不治

一烏紗覆頂

其症必咽喉啞塞鼻氣大粗乃血衰氣敗而元陽脫也不治

一梨花漫頂

用保元湯加天雄猶或可救

一雲掩天庭

遍身磊落光澤惟額上一片血痂如雲者乃心家客熱甚也急磨犀玳服之

一紫萍鋪額

其症熱甚咽喉痛悶亂發狂用小無比散加立參升麻犀角

一烏紗落額

不治

一 灰撲印堂 此症心家少血也若兼腹脹咽乾用保元湯加白芍涼血解毒湯好

一 楊花撲面 用內托散加天雄

一 赤珠繞唇 此乃脾經極熱也用小比散加雄黃

一 烏飯沾唇 此証必聲啞神昏目精不轉四肢厥冷喉响如錫三朝七日乃死期也

一 霞錦穿胃 此因火毒淫盛不治之症

一 紫雲佈胃 此症血枯氣滯毒來攻胃也其症必咬牙戰掉口唇焦裂頃刻命傾矣

一 黑棋排胃 三朝决死

一 柳絮飛胃 此乃血氣枯弱也保元湯加芍歸附主之

一 桃花映背 此症清火解毒可生

一 紫萍浮背 不治

一 黑砂落背 不治

一 雪鋪魚背

此血已枯盡 也不治

一 赤鱗穿腹

此症必大便秘小便淋瀝乃胃家熱甚 也用五苓甘露以和解

一 黑段纏腹

此症必肚內膨脹聲音 啞二日終矣

一 白梨墮腹

氣血衰敗也半月 之間發驚而死

一 葡萄葛落地

臀間紅紫一片若葡 萄者兩日命終

一 爛粟居臀

遍身俱好惟臀上一片如粟壳臭爛者 托補下元可轉

一 榴花散野

諸痘俱好惟四肢紅赤而唇口崩裂者 乃心脾肺三經熱也須涼血清火解毒

一 黑珠遍躰

四肢枯黑如火燒柴頭口中涎出氣冷 朝夕死矣

一 楊花墮枝

手足獨灰白者氣凝血滯也八珍湯加 附子治之

婦女痘

童女出痘與童男相同無以議也但天癸通者則治法不

能不異且夫發熱之初適遇經水如期而至則熱隨血解痘出亦輕不須服藥若過三四日而熱不止痘不出者此熱入血室血必妄行爲內動中虛之患宜涼血地黃湯加人參治之

一非經行之期於發熱之際而經忽至者此毒火內熾逼血妄行之故必痘多而毒盛急用涼血解毒湯倍加連翹牛旁使熱得清毒得解痘得出經得止始無他變遲則內虛痘必陷矣柳花散佳

一正當起發灌漿之時適遇經行過三日不止痘應起發而不起發應灌漿而不灌漿頂平形塌或灰白或黑陷此爲經血去多陰血虧耗必爲陷伏壞症矣急以八物

湯去地黃加黃耆木香熟附子以調元氣或葫荑酒噴之使痘起發灌漿或出增痘者爲吉若寒戰咬牙喘急腫滿手足厥冷者爲內脫不治之症矣

一起發灌漿之時經水適來忽口瘡而不能言者乃血入少陰不能上榮於口也宜先以當歸養心湯主之俟其能言後以大補湯治之或猪心血調服亦可

一經水不斷之時適逢出痘身發壯熱神思昏沉言語狂妄如見鬼神尋衣撮空此行經之後血室空虛天行邪熱乘虛而入犯於衝脉蓋肝藏血開竅於目神思昏者魂亂也目妄見者視亂也妄言者肝移熱于心也宜瀉肝散或小柴胡湯加生地丹皮

一 正直崩漏不止氣血俱虛之後適逢出痘此必不能勝任宜大補其氣血以十全大補湯八物湯加木香黃芪官桂主之使裏氣充足毒無留停更能飲食則可保全否則倒瀉不治矣

一向來經閉不通血海乾涸適逢出痘毒氣拂鬱於衝任之間二陽之併發其熱必甚若攻擊之則血妄行不止痘亦不出爲喘急爲腫脹爲陷伏矣須調其心脾使毒得發洩庶可以保其生以歸脾湯逍遙散治之脾和食進然亦方可收功

一 痘瘡起發至泡漿數日最宜表裏無病飲食如常若當此時忽然行經者人但知厭穢以觸正痘殊不知此乃

本身之血不爲之厭但恐血去裏虛防生陷伏之變急宜救裏解毒大補湯主之

一 姙婦最忌出痘蓋熱能動胎胎落則血氣衰敗痘必不能起發灌漿命其危矣故孕婦出痘深爲可慮蓋痘之用藥多主溫補如半夏肉桂之類皆姙婦所忌而烏附又非痘家所宜凡遇此症者不問輕重悉以清熱安胎爲主不可觸動其胎宜安胎散加黃芩芍藥主之血動者四物湯加芩連治之及罩胎散佐之身熱足冷腹脹者八物湯加木香脾氣虛不進飲食毒發不出者四君子湯加木香糯米紫草胎動不安者安胎散加砂仁痘出稠密者參芪內托散加紫草芍藥當歸單身熱有外

邪無內症者參蘓飲加木香更以如聖散爲主隨症加減如初發熱加升麻葛根連翹痘出太甚加酒炒黃芩大力子山查連翹不起發加大力子白芍藥口渴加麥冬知母天花粉痰多加半夏所謂可擾而擾似乎無擾故雖有胎不忌半夏也

一痘正在起發灌漿之時忽遇坐草分娩之期此氣血俱虛之候宜大補湯加熟附子主之以補氣血固表裏若產後小腹急痛者此血未盡也黑神散畧與行之不必拘泥若寒戰咬牙腹脹作渴足冷身熱者此脾胃內虛外作假熱也大補湯加熟附一二劑更用四君子湯加黃芪當歸陳皮木香多服止者吉不止者凶

一疹後十日或半月之間適逢出痘此無胎孕繫累只以大補氣血爲主以大補湯或八物湯去芍藥痘出多加連翹大力子大便秘者加肉荳蔻只照常一鉢用藥施治不必妄爲而多疑之反致誤事

一痘疹要訣曰妊婦出痘收醫之時胎落者多無事若發熱初出之時胎落者猶或可救若時當起脹灌膿而有犯此者多死蓋血氣衰敗無以逐其毒也

一痘已出未出不起不發隱在皮膚并治麻症斑症用梅花一兩桃仁二錢絲瓜五錢辰砂二錢甘草二錢爲末每服五分參蘓湯下

一痘不問前後凡黑陷咬牙寒戰用梅花六錢川山甲一

兩仙靈脾五錢射香一錢爲末每服三五分咬牙寒戰
加人牙二三厘內托散送下

快斑散

貫眾

赤芍藥

各一兩

甘草

升麻

枳殼

炒各五錢

右爲

末每服一錢水一盞竹葉七片煎至五分溫服看大
小與之按貫眾主腹中諸熱邪毒其性微寒凡痘瘡
煩渴咽燥喘急大便秘小便赤澁目赤皆裏熱也急
宜服之

西來甘露飲

清熱解毒如神凡發熱之初五日已前而熱不退痘色
紅紫口渴大便結燥服之卽能紅潤 亦治疹家煩熱